

Efesios

Efeso majarãre gojabeoñumi Pablo

¹ Yũhũ Pablo Goãmũ ïgũ gamero dopa ta Jesucristo yũre ïgũ yare buhedore apidigũ ãhraa. Eropigũ mũare Efeso majarãre gojabeoa. Mũare Jesucristore ðaro umupeorãre gojabeoa yũhũ. ² Goãmũ mari Pagũ mera Jesucristo mari Opũ mera mũare ðadoreã. ïgũ mũare itamuri mera ðaro árĩque mũa.

Cristo yarã mari árĩcũ ïagũ Goãmũ ðaro iimi marire, arĩ gojañumi Pablo

³ Goãmũ mari Opũ Jesucristo Pagũ marire ðaro iiniguicãmi. Árĩpehreri ïgũ ya ðari mera ïgũ mari pepirire ðarire ohomi mari ïgũ pohro árĩro dopa. Marire sĩporã turacũ iimi. Cristo yarã mari árĩcũ ïagũ eropa marire ðaro iimi. Gũa ïgũ eropiicũ ïha ðaro umupeoa. ïgũre ðaro wereniguia. ⁴ Őpa iipũ ïgũ marire ïgũ yarãre: I yeba árĩboro coregue ïgũ yarã árĩmorãre beyemũhtarũ ïgũ marire. Eropa beyegũ ïgũ marire ïgũ ïarore ñeri iiro marirã mari árĩmorãre iipũ. Eropigũ ïgũ marire “Ñerã ãhrima, arĩsome. ⁵ Marire mahigũ mojomoro ïagũ iribojegue õpa arĩmũhtarũ ïgũ marire: “Yũ magũ Cristo ïgũ itamuro mera erã yũ porã ðaro árĩrãcoma,” arĩ apipũ marire iribojegue ta. ïgũ gamediro dopa ta eropa iipũ ïgũ marire. ⁶ Marire ïgũ eropa ðaro iicũ ïarã

umupeoa. Īgure ðaro wereniguia. Īgu magu ĭgu mahigu Jesucristo yarā mari árĩcũ ĩagu, ðaro iimi ĭgu marire. ⁷⁻⁸ Eropigu ĭgu magu Jesucristo ĭgu di cóāgu sĩrigu mari ñeri iira dipuwajare wajayebasadi árĩmi. Īgu eropa wajayebasacũ mari ñeri iirare cādiĭidi árĩmi Goāmũ. Eropigu marire turaro mahigu, mariremojomoro ĩagu eropa iipu Goāmũ. Eropigu marire peamegue wabonirāre taudi árĩmi. Īgu ðaro masipehori mera eropiipu ĭgu. Eropirā ĭgure ðaro wereniguia. ⁹⁻¹⁰ Eropigu ĭgu marire ĭgu iiborore marire masicũ iimi. Iribojegue majarāre irire masicũ iibirimāripu ĭgu. Ōpa āhraa marire ĭgu iiboro. Īgu gamediro dopa ta ĭgu pepidiro dopa ta árĩpehrerāre Cristo dorero doca árĩcũ iigucumi. Eropigu árĩpehrerire ĭgu ya árĩcũ iigucumi. Īgu queorasubu árĩcũ umaro majarāre, i yeba majarā sāre ĭgu dorero doca árĩcũ iigucumi ĭgu. Eropigu umaro maja sāre i yeba maja árĩcũ sāre ĭgu ya dihta árĩcũ iigucumi. Eropigu Jesucristopu árĩpehrerā weca opu árĩgucumi. Eropiro árĩpehreri ĭgu ya dihta árĩroca. Erpa árĩbure árĩdorepu Goāmũ ĭgure.

¹¹ Eropi Cristo yarā mari árĩborore masiyugu Goāmũ marire beyetuhapu ĭgu yarā árĩmorāre. I árĩpehrerire apipu ĭgu, ĭgu pepidiro dopa ta ĭgu gamediro dopa ta iibu. ¹² Īgu eropiipu ĭgu yare guā iiborore. Īgu yare guā ðaro iicũ ĩarā gajirā sā ĭgure umupeorā “Turagu āhrimi,” arĩrācoma. Guāpu judio masa Cristore gamenuganirā arĩrā ĭgure umupeomuhtanirā árĩbu. ¹³ Mũa sā diaye wereniguirire, ðari

buherire peeabũ. Iri buheri mera ta Goãmu pohrogue warãca mua. Irire peerã ãgure umupeoa. Eropirã ãgũ yarã wahabu mua. Ōpa arĩpu Cristo: “Yũre umupeorãre Espĩritu Santore obeogura,” arĩ werepirũ. Eropigu ãgure mua ua iiborore. ãgũ yare gua ðaro iicũ ãarã gajirã sã ãmupeocũ ãagũ ãgũ Espĩritu Santore odigu arĩmi mũare. Eropigu ãgure mua opacũ, “Jesucristo yarã ãhraa,” arĩ masicũ iimi ãgũ mũare. ¹⁴Goãmu marire taricũ iiami. Eropigu pũhũ ãgũ pohrogue aãagucumi marire ãgũ oburire marire obu. Marire aãaboro core Espĩritu Santopũ mari mera ãhrimi. ãgũ mari mera arĩcũ Goãmu mera mari arĩborore ðaro masia. Goãmu marire ãgũ eropiicũ ãarã ãgure umupeori mera, “Ōagũ ãhrimi,” arãa mari.

Pablo Goãmũre serẽbasañumi Jesu yarãre

¹⁵⁻¹⁶ Eropigu Jesucristore umupeorã mua arĩcũ peebeo, arĩpehrerã ãgũ yarãre mua umupeo mahirire peebeogu Goãmũre “Ōhaa,” arãa. Eropigu umuri nũcu serẽbasaa mũare Goãmũre. ¹⁷ Mari Pagũ umaro majagu ãgũ yare mũare ðaro masicũ iidoregu serẽbasaa. Eropigu ãgure mua ðaro masinemoboro dopa serẽbasaa. ãgũ Goãmu Jesucristo mari Opũ Pagũ ãhrimi. ¹⁸ Eropigu mua ðaro masiboro dopa mũare serẽbasaa Goãmũre. ãgũ mũare taugu, ãgũ yarã arĩmorãre iimi ãgũ mũare. Eropigu mũare ãgũ yarãre ãgũ pohro ðaro wacũ iigucumi. Irire mua ðaro masiboro dopa serẽbasaa yũhũ Goãmũre. Eropigu ãgũ marire oburi sãre “Ōataria ãhraa,”

iri m̄ua arĩ m̄ua masiboro dopa serēbasaa. Ōpa m̄ua masiboro dopa serēbasaa m̄uare Goãm̄ure. ¹⁹ Mari Jesucristore umupeorãre ãḡu itamuḡu, ãḡu turari mera ãḡu iimi. ãḡu gajirã tauro turaḡu ãhrimi. M̄uare iri sãre õaro masiboro dopa serēbasaa mari Paḡu Goãm̄ure. ²⁰ ãḡu turari mera Cristo s̄iridiḡure masudiḡu árĩmi. Eropiḡu ãḡu turari mera umarogue ãḡu diayep̄u Cristo ãḡu doacũ iidi árĩmi Goãm̄u árĩpeherrerãre ãḡu doreboro dopa. ²¹ Ero doaḡu árĩpeherrerã umaro majarã oparã weca, árĩpeherrerã dorerã weca ãhrimi Cristo. Eropiḡu i um̄u majarã weca op̄u, gajip̄u majarã sã weca op̄u, árĩpeherrerã dohpague majarã, gajisubu majarã sã, puhruḡue majarã sã erã weca op̄u árĩbu ta ãhrimi ãḡu. ²² Eropiḡu árĩpeherrerã weca, árĩpeherrerã weca apip̄u Goãm̄u Cristore. Eropiḡu árĩpeherrerãre op̄ucucũ iip̄u ãḡure. Eropiro Cristo yarã yuju curu árĩrã erã op̄u árĩbure acup̄u ãḡure. Erã dipuru iro dopa árĩḡu ãhrimi ãḡu. ²³ Cristo yarã yuju curu árĩrã ãḡu dup̄u iro dopa árĩrã ãhraa mari. Cristo árĩpeherrerogue árĩniguimi. Eropiḡu mari ãḡu yarã mera árĩniguiḡu marire itamuniguicãmi.

2

Goãm̄u marire mahiḡu, mojomoro ãaḡu taup̄u marire, arĩ gojañumi Pablo

¹ Ñeri dipuwajacubonirã peamegue dederebonirã árĩquerecũ ta Goãm̄u m̄uare taumi. ² Iribojeguere i yeba majarã Goãm̄u tarinugarã iro dopa iim̄ur̄inirã árĩrib̄u m̄ua. Eropirã watĩ

ĩgu gamero dopa ta iimurinirã árĩbu mũa. Ĩgu watĩ i yeba doregu Goãmure tarinugarã opu ãhrimi. ³ Iribojegue árĩpehrerã mari opa dihta iinirã árĩribu. Mari ñeri dihtare ùaribejaribu. Mari ejatuharo mari pepiro dopa iimuriribu. Eropa árĩrã gajirã árĩpehrerã iro dopa ta mari sã ñerã árĩmuriribu. Mari árĩpehrerã masa mera eropa árĩrã árĩcũ ĩagu Goãmũ mari mera guagu dipuwaja moadiaripu. ⁴ Eropa iidiaque-regu ta marire turaro mahigu mojomoro ĩapu. ⁵ Eropa mahitarigu mari ñeri iira waja peamegue dederebonirã mari árĩquerecũ ta marire ĩgu mera árĩniguimorã árĩcũ iimi. Jesucristo ĩgu sĩribasara mera mari ĩgu yarã árĩcũ marire iimi. Marire mojomoro ĩagu taumi ĩgu marire. ⁶ Goãmũ Jesucristo sĩridire masugu ĩgu pohro apidigu árĩmi árĩpehrerãre dorebu. Eropigu ĩgu mari sãre ĩgu yarãre Cristo dorerire opacũ iimi. Eropirã ĩgu pohro ĩgu mera árĩrãca mari. ⁷ Eropiimi ĩgu pũhrugue majarã marire ĩgu mojomoro ĩarare erã masiboro dopa. Jesucristo marire ĩgu ðaro itamura mera ĩgu masare turaro ĩgu mahirire ĩhmumi. ⁸ Cristore mari umupeocũ Goãmũpu marire taricũ iimi. Marire mahigu ĩgu pohro ejacũ iigucumi. Mari gamero ðaro iiricũri mera Goãmũ pohro ejadiarã ejamasisme. Mari iibiriquerecũ apimi mari ĩgu pohro ejaburire. Eropiro waja mariro mũmũri nũcu ĩgu mera mari árĩburire ohomi marire. ⁹ Mari basi tarimasibirica. Mari iiri mera mari gamero mera tarirã mari "Gũa basi taria," arĩboca. Goãmũpu marire taumi ĩgu pohro mari wamorãre. ¹⁰ Jesucristo yarã árĩcũ iimi marire Goãmũpu. Eropigu

Jesucristo yarã mari áricũ ãagũ õarire iirã dihta wacũ iimi marire. Iribojegue ãañumi marire õarire iimorãre.

Cristore oparã õaro ãhraa, arĩ gojañumi Pablo

¹¹ Eropirã mũa ero coregue áricurare dohpague sãre guñaque. Mũare judio masa áribirãre gua judio masapũ ãhaturimuribũ. Gua circuncisión iinirã gasiro merogã wiri añirãpũ mũare gasiro merogã wiri añbirãre “Goãmũ yarã árĩbeaa mũapũ,” arĩmuribũ mũare. ¹² Irisubure mũa Cristo yarã áribirã boje majarã arĩmuribũ. Goãmũ beyenirã judio masa iro dopa áribirimuribũ mũapũ. Mũa eropa arĩnirã ãgũ beyenirã mera pepũri majarã ãhaturirã arĩmuribũ. Goãmũ mũare “Masare õaro iigũra,” ãgũ arĩ apinirã áribirinirã arĩribũ mũa. Mũa ñeri dipuwaja peamegue wabonirã arĩrã arĩribũ mũa. Goãmũ moorã arĩnirã peamegue dederebonirã arĩnirã arĩribũ. ¹³ Dohpaguepũre Jesucristo yarã ãhraa pare mũa. Iribojegue boje majarã arĩnirã arĩquererã, dohpaguere ãgũ yarã ãhraa pare mũa. Cristo mũa ñeri dipuwaja crusague ãgũ di cóãra pũhrũ Goãmũ yarã áricũ iimi mũare. ¹⁴ Eropigũ judio masare mũa ãhaturirã áricũ Cristo marire bosadigũ arĩmi. Masare bosagũ ãhrimi ãgũ. Judio masa, judio masa áribirã mera pe curu mari áricũ ãagũ ãgũ marire yuju curu ta áricũ iidi arĩmi. Mari ãhaturiri duhucũ õaro mera áricũ iimi ãgũ marire. ¹⁵⁻¹⁶ Õpa iimi ãgũ marire. Mari ñeri dipuwaja crusague sãrigũ, marire peamegue wabonirãre taugũ iimi. Eropa taugũ

ĩgu yarã ĩgu iimi marire. Eropigu mari ĩgu yarã wacũ pe curu mari árĩquerecũ ta yuju curu ta mama curu iimi marire. Eropigu iribojegue mari game ĩhaturinirã árĩquerecũ ta marire crusague sĩribasagu bosadigu árĩmi. Eropigu judio masa doreri pehrecũ iimi ĩgu. Erã doreri marire dũca wayoro pe curu majarã wacũ. Eropigu yuju curu ta árĩcũ iimi pare. Eropigu Cristo Goãmũ yarã árĩcũ iimi marire.

17 Eropigu marire bosagu arigu õari buherire Goãmũ mera õaro árĩburire weregu aridi árĩmi. Mũa judio masa árĩbirã Goãmũre opabirã boje majarã árĩnirã árĩribũ. Mũa eropa árĩcũ ĩagu mũare õari buherire weregu aridi árĩmi. Gũa judio masa sãre Goãmũ yare oparã sãre weregu aridi árĩmi. Eropigu árĩpehrerãre marire bosagu aridi árĩmi ĩgu. 18 Dohpaguere árĩpehrerã gũa judio masa, mũa judio masa árĩbirã sã mari Pagũ mera õaro árĩmasia mari. Espĩritu Santo ĩgu itamuri mera Cristopũ marire eropa árĩcũ iimi. 19 Eropirã dohpaguere mũa boje majarã árĩbeaa. ĩgu ya curu majarã ta ãhraa. Goãmũ yarãre ĩhaturirã árĩbeaa. Goãmũ yarã mera majarã ãhraa pare. 20 Goãmũ yare weremũhtanirã iribojegue majarã ĩgu ya wereniguirire goja, masare weremũriũma. Gũa sã ĩgu yare buhedore apinirã Jesucristo ya õari buherire werea masare. Gũa árĩpehrerã eropa werecũ peerã Cristore umupeonũgabũ mũa. Cristopũ ãhrimi mari árĩpehrerãre ĩgu yarã árĩcũ iigu. ĩgu eropa iibiricũ mari ĩgu yarã árĩmasibiriboya. 21 Eropigu ĩgu turari mera

marire ĩġu yaräre yuju curu ta árĩcũ iimi ĩġu marire. Eropirã ĩġu turari mera õarã wahaa mari. Mari eropa árĩcũ ĩagũ ĩġu mari Opũ ta mari mera ährimi. ²² Eropirã Cristo yarã árĩrã árĩpehrerã gajirã mera ĩġu yarã mera yuju curu wahabũ mũa sã. Mũa eropa wacũ Goãmũ ĩġu Espĩritu Santo mũa mera ährimi.

3

Judio masa árĩbirãre õari buherire wereñumi Pablo

¹ Mũa judio masa árĩbirã eropa ĩġu ya curu majarã árĩburire yũ werera dipuwaja peresugue ähraa yũhũ. ² Mũare judio masa árĩbirãre Jesucristo yare buhebure Goãmũ yũre apimi. Yũre mojomoro ĩagũ, yũre mahigũ õari buherire yũre weredoregũ, yũre apimi. Irire peetuhabũ mũa. ³ Iribojegue masa erã masibirirare Goãmũ dohpaguere yũre masicũ iimi. Ire merogã were mũare gojabeotuhabũ. ⁴ Yũ eropa gojabeorare buherã Cristo ĩġu yare yũ masirare masirãca mũa sã. ⁵ Iri ĩġu wererare iribojegue majarãre ĩġu erã masipehocũ iibiripũ. Dohpaguepũre gũare Jesu ĩġu apinirãre Goãmũ yare weremũhtarã sãre irire masipehocũ iimi Goãmũ. ĩġu Espĩritu Santopũ gũare masicũ iibasami. ⁶ Õpa ähraa ĩġu werera gajirã masibirira: Judio masa dihtare Goãmũ itamubeami. Judio masa árĩbirã sãre ĩġu itamumi. Õari buherire erã õaro peecũ itamugucumi ĩġu erãre. Eropirã gũa judio masa, mũa judio masa árĩbirã mera yuju dũpũ iro dopa yuju curu ta ähraa mari.

Eropirã mari árĩpehrerã Jesucristo yarã árĩrã yujuro mera Goãmũ ãgũ masare “Õaro iigũra,” ãgũ arĩ werepirare oparãca mari.

⁷ Goãmũ mojomoro ãagũ yũre mahigũ ire õari buherire werebure yũre apimi. ãgũ masiri mera apimi ãgũ yũre. ⁸ Árĩpehrerã gajirã Jesucristo yarã erã doca árĩrã erã docague majagũ gohra åhraa yũhũ. Yũ eropa árĩquerecũ ta judio masa árĩbirãre õari buherire werebure apimi Goãmũ yũre. Iri buheri Cristo õatariagũ ãgũ árĩrire, õatariari ãgũ oparire, õaro ãgũ oburire werebure apimi yũre. ⁹ Yũre eropa apigũ Goãmũ “Õpa masare taugũca,” arĩgũ, árĩpehrerã masare dohpa ãgũ itamuborore õaro werepehobure apimi yũre ãgũ. Goãmũ árĩpehrerire ihacũnugudigũ åhrimi. Iribojegue majarãre irire masare ãgũ tauborore masare werepehobirinipũ Goãmũ. Dohpaguere yũre iri õari buherire weredoregũ apimi masare ãgũ õaro tauborore masicũ iibu. ¹⁰ Eropirã iri buheri mera masa ãgũ yarã wahama. Erã eropa wacũ ãha umaro majarã oparã anyua Goãmũ masipehogũ ãgũ árĩricũrire masima. Erã eropa masicũ gamepũ Goãmũ. ¹¹ Eropigũ i yeba árĩboro coregue ta “Masare peamegue wabonirãre taugũra,” arĩtuhapũ Goãmũ. Eropa arĩdigũ arĩgũ dohpague mari Opũ Jesucristo ãgũ sĩriro mera ãgũ arĩdiro dopa ta marire taudi árĩmi. ¹² ãgũ eropa taucũ dohpaguere Cristore umupeorã ãgũ yarã wahaa mari. ãgũ yarã árĩrã gũiro mariro Goãmũ mera wereniguimasia mari. Eropirã gũibiricãque mũa. ¹³ Eropirã õari

buherire yu wereri waja dohpaguere peresugue árĩgu yu ñero taricũ iarã bujawerenijarã Goãmũ yare duhubiricãque. Ōari buherire yu werecũ peerã Goãmũ yarã wahabu mũa. Yũhũ eropiira dipuwaja peresugue ãhraa. Eropa árĩgu mũa ĩgu yarã árĩburire ñero tarigu iiaa. Eropigu turaro mucubiridorea mũare.

Cristo masare turaro mahimi, arĩ gojañumi Pablo

¹⁴ Eropigu i árĩpehrerire mari Opũ Jesucristo Pagu ĩgu iirare guñagu mereja ĩgure serẽbasaa mũare. ¹⁵ Árĩpehrerã ĩgu yarã Pagu ãhrimi. ĩgu árĩpehreri cururi majarã ĩgu yarã ĩgu pohrogue árĩrã i yeba árĩrã sã erã Pagu ãhrimi. ¹⁶ ĩgu masipehogu ãhrimi. Turatarigu ãhrimi. Eropigu ĩgure õpa serẽbasaa mũare. Mũare sĩporã ĩgu masiri mera õaro turacũ iiboro dopa serẽbasaa mũare. Eropigu Espĩritu Santo ĩgu itamuri mera eropa iigucumi. ¹⁷ Eropigu Cristore “Diaye iigu ãhrimi,” mũa arĩ umupeonemoboro dopa ĩgu mũa mera õaro árĩboro dopa serẽbasaa mũare. Eropigu gajirãre õaro mahirã mũa árĩboro dopa, Cristo ĩgu turaro mahirire mũa masiboro dopa serẽbasaa mũare. ¹⁸⁻¹⁹ Mũa árĩpehrerã gajirã Goãmũ yarã mera “Cristo ĩgu marire turaro mahimi,” mũa arĩmasiborore serẽbasaa mũare. ĩgu mari masare turaro mahigu ãhrimi. ĩgu mahiri eropa õatariari árĩcũ mũa õaro masiboro dopa serẽbasaa mũare. Eropigu ĩgu mahirire mũa masicũ gahmea Goãmũ mũa mera ĩgu õaro árĩboro dopa. Eropigu irire serẽbasaa mũare Goãmũre.

20 Eropirã Goãmure wuaro umupeori mera “Ïgu turagu ahrimi,” arĩrãca. Ïgu turari mera õaripure gohrotomasimi Ïgu marire. Marire õarã árĩcũ iimasimi. Mari serẽra tauro iimasimi Ïgu. Mari gamerire, mari pepira tauro iimasimi Ïgu. 21 Jesucristo yarã mari árĩcũ ïha Cristo Ïgu árĩricuri sãre ïha árĩpehrerinre. Eropigu Ïgu mahirire mua masicũ gahmea Goãmũ mua mera Ïgu õaro árĩboro dopa. Eropigu irire serẽbasaa muaruri árĩpehrerã Goãmure umupeoro. Eropã ta iiporo.

4

Cristo yarã árĩrã yuju curu ta ahraa mari, arĩ gojañumi Pablo

1 Mari Opure yu itamuri waja peresugue árĩgu muare turaro werea yuhũ. Goãmũ Ïgu yarã árĩmorãre muare beyerũ. Eropirã Ïgu beyenirã árĩrã Ïgu árĩdorediro dopa ta õarã árĩque mua. Irire muare werea yuhũ. 2 Õpa iirã õarã árĩque mua: “Gajirãre masitarinugaa yuhũ,” arĩ pepibiricãque. Gajirãre õaro mera iique. Eropirã guabiricãque. Mua mera majarã muare gariboquerecũ ta erãre umupeori mera yuju diaye ïacãque. 3 Eropirã Espiritu Santo Ïgu itamuri mera õaro mera yujuro mera árĩniguique mua. Eropirã gamequeãro mariro árĩcãque mua. 4 Yuju dũpũ iro dopa yuju curu ta ahraa mari. Eropigu Espiritu Santo yujugu ta ahrimi marire. Eropigu Goãmũ Ïgu yarã árĩmorãre marire beyemuripũ marire itamubu. Eropirã Ïgu itamuborore masia mari. Iri mari

masirañe yujuñe ta ãhraa. ⁵ Mari Opu Cristo mari umupeogu yujugu ta ãhrimi. Igu buheri sa yujuñe ta ãhraa. Igu yarare wañyeriñe sa yujuñe ta ãhraa. ⁶ Eropigu Goamu yujugu ta ãhrimi. Igu arñpehrerã Pagu ãhrimi. Eropigu arñpehrerã weca mari Opu ãhrimi. Eropigu arñpehrerãre marire itamumi igu. Arñpehrerã mari mera ãhrimi igu. Eropigu arñpehrerogue ãhrimi igu.

⁷ Yuju curu mari arñquerecũ ta arñpehrerã marire yujurãyerire mari mohmemasiburire apidi arñmi marire Cristo. Igu eropa apidiro dopa ta mohmemasia mari. Igu marire eropa apigu gajinore igu eropa ocãbodirop dopa ta apidi arñmi igu marire. ⁸ Eropã ta ãhraa Goamu yare erã gojarapũgue sa:

Goãmure ñaturirãre igu tarinũgara puhrũ igu dipaturi muria wagucumi. Eropigu masare baja eropa ocãgucumi, arñ gojañuma iribojegue Jesucristo igu eraboro coreguere.

⁹ Erã eropa arñ gojarã õpa werediarã iiriñuma: Jesucristo umusigue muria wadigu arñgu igu ero coreguere dijarimũhtadigu arñmi. I yebaguere dijaridigu arñmi. ¹⁰ Eropigu igu dijaridi muria wadi ta arñmi Goamu pohrogue. Arñpehroero weca muria wadi arñmi igu arñpehrerogue arñbu. ¹¹ Eropigu igu yarare baja eropa ocãgu erã Goamu ya arñburire mohmemasiburire apidigu arñmi. Erã mohmemasiburire õpa apidigu arñmi igu yarare. Yujurãyerire Cristo igu buherare buhemorãre apidi arñmi.

Gajirãre Goãmũ yare weretaumorãre apidigũ árĩmi. Ōari buherire buhe curimorãre gajirãre apidi árĩmi. Cristo yarã gamenererã oparã árĩmorãre erãre ōaro buhemorãre apidi árĩmi gajirãre. ¹² Eropa dihta apidigũ árĩmi marire gajirã ĩgũ yarãre mari game itamuboro dopa. Eropa apidigũ árĩmi marire ĩgũ yarãre, ĩgũre mari umupeonemoboro dopa, sĩporã turarã mari waboro dopa. ¹³ Eropirã mari árĩpehrerã ōaro mera, yujuro mera árĩrãca. Eropa ta árĩro gahmea marire Cristore umupeorã árĩrãre. Eropirã mari árĩpehrerã Goãmũ magũre Jesu-cristore ōaro masirãca. Eropirã Cristo turagũ, pee masigũ ĩgũ árĩro dopa ta, mari sã pee masia warãca. ¹⁴ Mari eropa warã majirãgã iro dopa árĩsome mari. Majirãgã iro dopa ta árĩrã ōaro pee masinibeama dohpa. Eropirã gajirã gũyarã erãre buherã eracũ “I diaye ãhraa,” erã arĩcũ erã peema. Pũhrũ gajirã gajiropa árĩri buherire buherã eracũ erã sãre peema. Erã iro dopa árĩsome mari. ¹⁵ Eropa árĩbirã mari mera majarã mera game mahirã diaye ta wererire game wererãca mari. Eropirã majirãgã erã bũga erã pee masirã erã waro dopa ta mari sã Goãmũ yare pee sĩporã turarã Goãmũ yare ōaro masirã warãca. Cristo ĩgũ árĩro dopa ta warãca. ĩgũ ãhrimi mari dipuru. ¹⁶ ĩgũ yarã árĩrã ĩgũ dũpũ iro dopa yuju curu ta ãhraa mari. Mari bajarã árĩquererã ta yujuro mera ōaro árĩrã iiaa. Mari eropa árĩborore Cristo itamumi. Eropirã mari yuju dũpũ iro dopa ōaro gamesũrirã mari ōaro itamua gajirãre Cristo yarãre. Eropirã mari

mera majarãre Cristo yarãre ðaro mahirã, erãre ðaro itamurã, turarã, Cristore umupeonemorã árĩrãca mari.

Cristo yarã warã mari ñerire duhu, ðaripure gohrotoa mari, arĩ gojañumi Pablo

¹⁷ Eropi mari Opũ Cristo ĩgu dorero mera õpa werea mũare. Goãmure gamebirã gohra iiro dopa iibiricãque mũa. Erã, erã pepiripũ ñeri dihta ãhraa. Eropiro erã pepiri duhpiburi árĩbeaa. ¹⁸ Eropigũ watĩpũ Goãmũ yare erãre peebiricũ iimi. Eropirã Goãmũ yapure peebirigohracãma. Peediabeama erã. Eropirã Goãmũ ĩgu ðaro árĩdoreldiro dopa ta árĩbeama erã. ¹⁹ Eropirã erã ñerire iirã ne gũhyasĩribirigohracãma. Eropirã ne bujawerebeama. Ñerire erã ùaribejari dihtare iiniguicãma. Árĩpehreri ñerire erã iirire ne duhudiabirã iinemoniguicãma. ²⁰⁻²¹ Mũapũ diaye ta ĩgu yare peerã mũa árĩcũ, Jesucristo yare ðaro masirã mũa árĩcũ mũapure erã ñero iiro dopa iidorebeami Goãmũ. ²² Iribojegue ñerire iiniguicãrã mũa árĩcũ iri ñeripũ mũare goroweoro iidiro árĩbũ. Iri ñeri iiri mera mucubiridi-aquererã ta ne mucubirimasibirimũribũ mũa. Eropirã “Iribojegue mũa árĩrãre duhcãque,” yũ mũare arĩ buhecũ peebũ mũa. ²³ Eropirã mũa pepiripure ðaripure gohrotooro gahmea mũare. ²⁴ Ero core mũa ñero iirare duhcãque. Eropirã ðaripure gohrotonirã árĩque mũa. Goãmũ ĩgu ðagũ árĩldiro dopa mũare ðarã árĩcũ iimi. ĩgu eropa iinirã árĩrã ðarire iiniguicãrãca. Eropirã ñerire gamebirãca.

25 Mari yuju dɔpɔ iro dopa yuju curu majarã ta árĩrã iiaa. Eropirã mɔa basi gɔyabita. Mɔa mera majarãre diaye wereque gɔyaro mariro.

26 Gajirã mera guarã, erãre ñero iibiricãque. Mata irinɔ ta amucãque gua wajaro mariro.

27 Yoari boje guarã watĩ ãgɔ gamero dopa iirã iiaa. Eropa iibiricãque.

28 Gajirã mɔa mera majarã Jesu yarã erã árĩboro core yajari masa árĩnirã árĩñorã. Dipaturi yajabiricãporo. Eropirã dohpaguere òaro mohmeporo. Mojomorocɔrãre oburire mohmeporo.

29 Ne ñero wereniguibiricãque. Òarire wereniguirã gajirãre itamua mɔa. Erã bɔjawererã erã árĩcũ ãarã eropa ta mucubiricũ iicãque erãre. Eropirã òari dihtare wereniguique. 30 Ñerire iirã Espíritu Santore bɔjawerecũ iirã iiaa mɔa. Eropa iibiricãque. Dohpaguere ne i ɔmɔ pehrerinɔ core, Cristo marire ãgɔ aĩgãboro core, Espíritu Santo marire ãhadibumi. Ñerire mari iibiriboro dopa ãhadibumi. Eropigɔ Cristo yarã mari árĩrire masicũ iimi ãgɔ marire. Eropirã ãgure bɔjawerecũ iibiricãque mɔa.

31 Eropirã ne papũriniguibiricãque. Guanemobiricãque. Game dɔyasonemobiricãque. Erãre ñero arĩ gaguiniguibiricãque. Gajirãre quere moanemobiricãque. Gajirãre ãhaturinemobiricãque. 32 Eropi mɔa mera majarãre òaro mera òaro iique. Cristo yarã mɔa árĩcũ ãagɔ mɔa ñerare

cãdijicãmi Goãmũ. Eropa ta mũa sã gajirã mũare erã ñero iicũ ãarã erã ñerire cãdijicãque.

5

Goãmũ porãre õpa ářĩro gahmea, arĩ wereñumi Pablo

¹ Eropirã Goãmũ porã ĩgũ mahirã árĩrã ĩgũre ĩhacũque mũa. ² Eropirã gajirãre mahi umupe-oniguicãque. Cristo marire mahigũ, mari ñeri iira waja sĩripũ. Eropa sĩrigũ Goãmũre mucubiricũ iipũ ĩgũ. Eropirã marire ĩgũ mahidiro dopa ta mũa sã gajirãre game mahique.

³ Eropirã Goãmũ yarã árĩrã ne nome mera ñero iibiricãque. Nome sã ũama mera ñero iibiricãque. Gaji ñerire eropa árĩrire ne iibiricãque. Gajinore gametaribiricãque. Ne eropa iibiricãro gahmea Goãmũ yarã árĩrãre. ⁴ Eropirã gũhyasĩuro wereniguibiricãro gahmea mũare. Pee masibirã iro dopa wereniguibiricãro gahmea mũare. Eropirã ñero arĩ wereyabiricãro gahmea. Ipũre iiro gahmea mũare: Goãmũre serẽro gahmea mũare. Eropa serẽrã ĩgũre, “Õaro iiabũ mũhũ gũare,” arĩro gahmea. ⁵ Gajinore gametarirã goãmarã wéanirãre erã umupero dopa iirã iiaa mari irire. Eropirã nome mera ñero iirã, ñeri dihtare pepirã, gajinore gametarinũgarã Goãmũ Cristo mera ĩgũ opũ árĩroguere ne wasome erã. Irire õaro masia mari. ⁶ Õpa iirãre erã iira dipuwaja, turaro dipuwaja moagũcumĩ ĩgũre tarinũganirãre. Eropirã gajirã mũare gajiropa arĩmaacãcũ erã

guyarire peebiricãque. ⁷ Eropirã eropa ñerire iiniguicãrãre wapicãbiricãque.

⁸ Cristo yarã mũa árĩboro core mũa sã eropa ta iinirã árĩribũ. Dohpaguepũre ïgũ yarã árĩrã, Goãmũre òaro masia mũa. Goãmũ yarã òarire iima. Eropirã eropa ta iiro gahmea mũare. ⁹ Eropirã Cristo yarã árĩrã òarire, Goãmũ gamerire, diaye maja árĩrire iirãca mũa. ¹⁰ Òarire mari iicũ ïagũ mari Opũ Cristo mucubirimi. Eropa òarire iiburire òaro masique mũa. Eropa masirã irire iique. ¹¹ Cristore gamebirã ñeri erã iimaacãri ñeri gohra ãhraa. Eropa erã iiro dopa ta mũapũ iibiricãque. Òari buherire Cristo yare wereque erãre. Eropirã erã ñeri iirare erãre masicũ iique. ¹² Masa erã ïabiro erã ñero iicorema. Erã eropa iirare mari wereniguirã gũhyasĩriboca. Eropirã ñetariaro iirã iima erã. ¹³ Eropirã erãre òari buherire mari wererã, ñetariarã erã árĩricũre erãre masicũ iirã iiaa mari. Erã ñeri iirire erãre masicũ mari iicũ erã ñeri iirire bũjawerebocoma. Eropirã òaripũre gohrotobocoma. ¹⁴ Iri diaye ta ãhraa. Eropirã òpa wereñorã Goãmũ yare wererã:

Ne, yũre peediabirã, yũre peeque. Mũa ñero iirare bũjawereque. Irire ñero iirire duhuque. Eropigũ Cristo mũa ñeri iirire masicũ iigũ, mũare òarire masicũ iigũcumĩ, arĩñorã.

¹⁵ Eropirã ɯmũri nũcũ òaro iique mũa. Pee masibirã iro dopa árĩbiricãque. Pee masirã árĩque. ¹⁶ Dohpague majarã masa ñetariaro iiniguima. Eropirã mũapũ òarire, Cristo yare

mua iiniguirã mata erã Cristo yarã árĩcũ itamuque. ¹⁷ Eopirã pee masibirã árĩbiricãque. Goãmũ ĩgũ gamerore õaro masique. Eopirã irire iique. ¹⁸ Eopirã ne merebiricãque. Mererã erã basi ñero goroweoma. Eopirã merediabirã, Espíritu Santopũre bũrigã gameque. ĩgũre õaro yũhrirã árĩque. ¹⁹ Eopirã mua basi Goãmũre umupeori bayarire game bayaque. Eopirã Salmo gojaripũre, Goãmũ yare bayarire, gaji ĩgũre umupeori bayari sãre ĩgũre bayapeoque. Õaro guña umupeori mera bayapeoque. Eopirã mari Opũre “Õagũ ãhrimi,” arĩ õaro umupeoque. ²⁰ Goãmũ mari Pagũ árĩpeherrerire mũare ĩgũ õaro iirire guñaniguicãque mucubiriri mera. Mari Opũ Jesu yarã árĩrã ĩgũre “Õhaa,” arĩniguicãque mua.

Mua yuju wihi majarã Jesu yarã árĩrã, õpa iique, arĩ wereñumi Pablo

²¹ Mua mera majarãre game umupeo yũhriique. Mua eropa game umupeo yũhrirã Cristo sãre umupeo yũhrirãca.

²² Mua marasã nomere weregũra dohpaguere. Mari Opũre Cristore mari yũhriro dopa ta mua marapũ sũmarãre õaro yũhriique. ²³ Jesucristo marire taudigũ árĩmi ĩgũ ya curu majarã mari árĩboro dopa. Eopirã mari ĩgũ ya curu majarã árĩcũ mari Opũ ĩgũ árĩro dopa ta mua marapũ sũmarã mua marasã nomere weca oparã ãhrima. ²⁴ Eopirã Cristo yarã árĩrã ĩgũre yũhria. Eopirã mari Cristore yũhriro dopa ta mua marapũcũrã nome mua marapũ sũmarãre õaro yũhrirã nome árĩque.

²⁵ Mũa marapũ sũmarã sãre weregũra dohpague. Cristo marire ãgũ yarãre mahigũ mari ya áriburire sãridigũ árimi. Eropirã marire ãgũ mahidiro dopa mũa sã mũa marasã nomere eropa mahiniguicãque. ²⁶ Cristo marire ãgũ yarã áricũ iibu sãripũ mari ñeri marirã áricũ iibu. Eropigũ mari ñerire coeweadĩ árimi ãgũ werenigũiri mera deco mera ãgũ waĩyeri mera. ²⁷ Eropa coeweadĩ árimi ãgũ marire ãgũ yarã õarã árimorãre iigũ. ãgũ eropiicũ ñeri dipuwaja marirã árirãca ãgũ ãacũ. Ne merogã eropa áriiri ñeri árisome marire. Eropirã õarã Cristo iro dopa árirãca. ²⁸ Eropirã mũa marasã nomere mahi umupeorã, mũ basi mũ dũpũre mũ umupeoro dopa ta mũa mũ marapore umupeoque. ãgũ marapore umupeogũ ãgũ basi umupeogũ iimi. ²⁹⁻³⁰ Ne mari dũpũre ñero wacũ gamebeaa mari. Mari basi mari ya dũpũre ãhadibua. Cristo yarã árirã ãgũ dũpũ iro dopa ãhraa. Eropigũ marire ãgũ õaro ãhadibumi. Eropirã Cristo marire ãgũ õaro iidiro dopa ta mari sã mari dũpũre õaro iiaa. Mari marasã nome sãre eropa ta õaro iiro gahmea marire. ³¹ Eropa ta ãhraa Goãmũ yare erã gojarapũgue: Õpa gojara ãhraa: “Eropi umũ ãgũ pagũ sũmarãre wirigũ, ãgũ marapo mera áricãgũcumi. Eropirã erã perã áriquererã ta yuju dũpũ iro dopa árirãcoma,” arĩ gojañumi iribojegue. ³² I gojarare õaro peebirinirã árima. Eropigũ irire õaro weregũra mũare. Õpa werero iica: Cristo ãgũ yarã mera yuju dũpũ iro dopa ta yuju curu ta ãhrima. ³³ Eropigũ mũare õpa arĩ werenemogũra daja: Mũ basi mũ mahiro

dopa ta m̄ marapo s̄are mahi umupeoque. Eropirã nomer̄ m̄a marap̄ s̄umarãre ðaro ḡhyadiaro mera umupeoque m̄a.

6

¹ Dohpaguere majirãre weregura: Mari Op̄ Cristo yarã árĩrã m̄a paḡ s̄umarãre ðaro ȳhrirã árĩque. M̄a eropiirã ðaro iirã iiaa. ²⁻³ Õpa arĩñumi Goãm̄ doreḡ: “M̄a paḡ s̄umarãre ðaro umupeoque,” arĩ doreñumi ïḡ. I doreriñe mera Goãm̄ werenemoñumi. Õpa arĩñumi: “M̄a paḡ s̄umarãre umupeorã i yebaguere yoari boje mucubiriri mera árĩrãca m̄a,” arĩ wereñumi. Eropa arĩḡ iñe doreriñe mera, “M̄a eropa iirã ðaro árĩrãca,” arĩ werem̄htañumi Goãm̄. Eropirã ïḡ arĩdiro dopa m̄a paḡ s̄umarãre umupeoque m̄a.

⁴ Dohpaguere erã paḡ s̄umarãre weregura. M̄a porãre eropa turiniguibircãque guac̄ iiri arĩrã. Mari Op̄ Cristo ïḡ mahiri mera ïḡ itamuri mera erãre ðaro mera masuque. Eropirã erãre masurã ðaro wereque.

⁵ Dohpaguere pohro majarãre weregura. Ḡhyadiaro mera umupeori mera i yeba majarãre m̄a oparãre ðaro ȳhrirã árĩque. Ḡyaro mariro ðaro ȳhrirã árĩque. Cristore m̄a ȳhribodiro dopa ta ȳhriquerãre m̄a.

⁶ Erã ïhuro dihtare ȳhrirã árĩbircãque ȳre ïhasuaporo arĩrã. Erã ïhurore m̄a ȳhriro dopa ta erã ïabiro s̄are ðaro iirã árĩque. Cristo ïḡ pohro majarã m̄a árĩbodiro dopa ta m̄a oparã s̄are eropa ȳhriniguicãque. Eropirã Goãm̄ ïḡ gamero dopa ta ðaro

mucubiriri mera mũa oparãre ðaro yũhrirã áríque. ⁷ Eropirã “Cristopũre yũhrirã iiaa,” arĩ pepirã mucubiriri mera yũhrique mũa oparãre. ⁸ Eropirã ire guñaque: Árípehrerã mari árípehreri ðarire mari iicũ ïagũ Goãmũ ðaro iigũcumĩ marire. Pohro majarãre, pohro majarã áribirã sãre ðaro iigũcumĩ ïgũ.

⁹ Eropigũ oparã sãre weregũra: Mũa pohro majarãre ðaro iique. Erãre ðaro yũ iidoreldiro dopa ta iique erãre ðaro. Őpa masique. Őmũsi majagũ Goãmũ diaye ta erã opũ ãhrimi. Mũa yagũ opũ ãhrimi ïgũ. Eropirã mũa árípehrerã ïgũ pohro majarã dihta ãhraa. Eropigũ ïgũ yujuropa ïhami mũare árípehrerãre. Eropirã turibiricãque mũa pohro majarãre.

Cristo yarã watĩre erã cãhmotarire wereñumi Pablo

¹⁰ Őpa weretugũra mũare. Őaro guñaturarã áríque mũa. Mari Opũ Cristo mũa mera ãhrimi. Eropirã ïgũ ya turari mera guñaturarã áríque.

¹¹ Watĩ marire ïgũ pepiri mera gũyagũ ñero iidoremi marire. Mari Jesucristore umupeorire goroweodiami. Goãmũpũ marire cãhmotami ñerire mari iibiriboro dopa. Marire ïgũ cãhmotaro surara ïgũ cãhmotari suhriro come suhriro iro dopa ãhraa. Eropirã iri suhri mera erã cãhmotaro dopa ta Goãmũ ïgũ yare iirã cãhmotaque watĩ ïgũ ñero iidorerire. ¹² Jesu yarã mari áricũ marire goroweodiarã masa gohra áribeara. Erã bajarã mũmaro majarã, ñerã, turarã, oparã erãpũ ãhrima. Watĩ ïgũ mera majarã mera i mũmũ majarãre Jesucristo

yarã árĩbirãre dorema erã. Eropirã erã mari Jesucristo yarã árĩcũ marire goroweodiana. ¹³ Eropirã erã marire goroweobiricũ dohpaguere Goãmũ yare opapehoque mũa cãhmotaborore. Eropirã watĩ mũare ñero goroweodiacũ, mũare ãgũ ñero iidorecũ ãgũre cãhmotarãca. Eropirã tarinũgarãca. Eropa ãgũre tarinũgarã, turarã dujarãca mũa. ¹⁴⁻¹⁷ Eropirã turarã árĩque Goãmũ ya mera. Surara gamewejẽrã warã erã come suhri sañarã erã dũpũre õaro cãhmotama. Erã coretihbi cãhmotama erã come suhriro sañarã. Come zapatu sañama. Erã diapore cãhmotama comese mera. Come sãpea peyama. Ñoserimijire opama erã cãhmotaboro dopa. Erã surara cãhmotaro dopa ta mũa watĩre õaro cãhmotapehoborore õpa Goãmũ yare iique. Diaye majare Goãmũ yare õaro peeque. Eropirã Goãmũ gamero dopa õarire iiniguicãque mũa watĩre cãhmotamorã. Jesucristo ya õari buherire peerã õaro ãhraa. Eropirã iri õari buherire õaro wererã waque gajirãre. Watĩ mũare ñero iidorediarimi. Eropirã ãgũre cãhmotamorã Jesucristore “Diaye iigũ ãhrimi,” arĩ umupeoniguicãque. Cristopũ marire peamegue wabonirãre taumi. Mũa ãgũ taunirã árĩrã watĩ ñero iidorerire yũhribiricãque. Eropirã watĩre tarinũgamorã Goãmũ yare õaro masique mũa Espĩritu Santo ãgũ itamuri mera. ¹⁸ Eropirã mũa watĩre cãhmotarã Goãmũre eropa umũri nũcũ serẽniguicãque. Espĩritu Santo ãgũ itamuri mera serẽniguicãque. Eropirã õaro guña masique.

Eropa serērã gariborebiricãque. Árïpehrerã Goãmũ yarãre eropa serëbasaniguicãque. ¹⁹ Eropirã yũ sãre serëbasaque Goãmũre. Õpa arï serëbasaque: Õari buherire iribojegue masa erã õaro masibirirare õaro erãre masicũ yũ iiborore serëbasaque. Eropirã güiro mariro yũ wereboro dopa serëbasaque yũre. ²⁰ Cristo ïgũ yare weredoregũ yũre obeomi. Yũ eropa werera waja peresugue ãhraa dohpaguere. Yũhũ ohõ árïqueregũ ta güiro mariro ïgũ yare yũ wereboro dopa serëbasaque yũre. ïgũ yare werebu árïgũ tiiaa.

Pablo õadoretuñumi

²¹ Tíquico yũ mera majagũ mũa pohrogue ejagũ yũ árïricũrire mũare werepehogũcumi. ïgũ mari acaweregũ mari mahigũ ãhrimi. Eropigũ mari Opũ yare õaro itamugũ eropa árïniguicãmi. ²² Gũa árïricũrire mũare were-doregũ ïgũre obeogũ iiaa mũa pohrogue mũa õaro mucubiriboro dopa.

²³ Goãmũ mari Pagũ mari Opũ Jesucristo mera mũare árïpehrerãre gũa acawererãre õadorea. Cristore mũa õaro umupeori mera mũa game mahiboro dopa Goãmũre serëbasaa mũare. ²⁴ Árïpehrerã mari Opũ Jesucristore eropa mahiniguicãrãre Goãmũ mera õadorea. Eropa ta árïniguicãporo. Iripêta ãhraa.

Goãmu Yare Wereripu

Desano: Goãmu Yare Wereripu New Testament

copyright © 2011 Wycliffe Bible Translators, Inc.

Language: Desano

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 21 Feb 2024 from source files dated 29 Jan 2022

17771afc-c309-57fd-9ff3-2d5a0cd59ff1